



Kamis, 14 Oktober 2021

Ogen: Roma 5:4-5



“Saber Dingen Erpengarapen ”



Ndigan nge kam terakhir kali kecewa sabap sura-surandu la tersehi? Kai pe pengarangpennu gundari enda i bas erbage-bage nanam kegeluhen si nggo ibentasinu?. *Saber dengen erpengarapen* eme tema bas wari enda. Uga pengakapndu? mberat? payo, labo kerina jelma ngasup guna saber i bas kerina sura-surana ras labo ka kerina jelma nggeluh erpengarapen i tengah-tengah perbeben kegeluhenna. Adi perdiatekenndu kerna tema perikop bas nats-ta wari enda tertulis "*rembak ras Dibata*". Kepeken bahanta enda ngajuk kita i bas kita ngerembakken diri ras Dibata (bali bagi bahan i bas wari si nderbih) sidatken ulihna kerembakken e eme saber dengen erpengarapen. Ikataken i bas nats-ta, kalak si saber tentu ia me pemenang si tuhu-tuhu i bas naluken doni enda arah kerina perbeben kegeluhen. Arah saber enda me maka turah pengarapen e. Adi kita nggeluh erpengarapen tentuna kai pe hasil nandangi proses kegeluhenta ngasup kita megenggeng amin gia si reh la bagi ukurta. Erngasupna kita tetap ngataken bujur man Dibata i bas kerina situasi kegeluhenta ras kerembakenta tetap nteguh i bas kerina situasi si la bagi ukurta. Enda me gegeh situhu-tuhu si nggo isikapken Dibata. Kai pe labo banci bagi ukur ras kai pe labo mungkin terjadi bagi sura-suranta. Kuncina, nggeluh ngerembakken diri ras Dibata sabap pasti turah kesabaren ras pengarapen. Mesui, pagit, macem, la teraloken ukurta, emosi, dendam mungkin e piga-piga nanam si terjadi i bas kerehen perbeben e. Tapi apakah nggit kita lalap tedih bas nanam si mejin ndai? Apakah e ndungi perbebenndu?. Mari cuba sirefleksiken wari enda kerna Dibata nggo nikapken kerna sada gegeh banta ibaskita tetap ngerembakken diri ras IA amin susah senang kegeluhen enda. Mari sicubaken mpeturah kerna kesabaren ras pengarapen enda ndai alu sikap ertoto si endeken KEE 320:1 "Susah entah senang gia ibas geluh enda", emaka pindolah penampat Dibata.